

Pɔɔlo ɔwole ɔbono ɔ ɲmarase Bunge
Filipayi Awura Mɔ

¹ Me Pɔɔlo de Timoti, aye abono a gyɛ Kirisito Yesu gɛsun awɔrabo mɔ, ne n kya ɲmarase ɔwole baare. A kya ɲmarase a kya sa fɛye abono pɛwu fɛ bo Filipayi ɔsowole so ne fɛye-rɛ Kirisito Yesu ginyamesɛ kolon mɔ so mɔ, Wurubuaare gi lɔɔ fɛye yela sa mɔ-nyoro mɔ. Fɛye-rɛ fɛye-abelɛnsɛ abono mɛ kya kerɛ fɛye so mɔ de abelɛnsɛ mɔ akpaabo pɛwu ne a kya sa ɔwole baare. ² Aye-sɛ Wurubuaare de Wura Yesu Kirisito mɛ' sa fɛye so gɛwɔnsa dɛnsɛ de mɛ' sa fɛye gisen yuuli.

Pɔɔlo Kya Dalaa Ne ɔ Kya Faala Wurubuaare Inj Kya Ta

³ Owi kamaase n kya nyingi fɛye Filipayi awura abono fɛ kya son me-Wura Wurubuaare mɔ, n kya faala mɔ inj kya ta. ⁴ Me-ndalaa nbono n kya dalaa sa fɛye pɛwu mɔ, i kya wɔra me-gisen dɔ ɔkon. ⁵ I kya nyiile yɛɛ n kya nyingi gɛnɔɔbono aye-rɛ fɛye a san a kya wɔra Yesu ɔkalan konkonsɛ mɔ gɛsun kpɛ kyu lii gɛkaabono fɛ daa ginu ɔkalan mɔ kyu baa lii de ndɛ. ⁶ Gɛnɔɔbono Wurubuaare gi yii gɛsɛ ɔ kya wɔra ilaa dɛnsɛ fɛye-asen dɔ mɔ, n nyi me-gisen dɔ yɛɛ gɛnen Wurubuaare kolon baare kee laa wɔra imɔ kpaalɔgɛ gɛkaabono Yesu Kirisito laa kii ba mɔ.

⁷ I kaabore n' sa gɛwɔnsa kyu lii fɛye Filipayi awura abono fɛ kya son Kirisito mɔ pɛwu so. I lii fɛɛ fɛye-ilaa i bo me-gisen dɔ. Wurubuaare wolaa ɔ kya kpaalɔgɛ aye ne ɔ kya wɔra ilaa sa me-rɛ fɛye pɛwu dabɔlɛ. Owi ɔbono mɛ keda me tii de obu faa de owi ɔbono n kya lɛɛ gɛnɔ kyu lii Yesu ɔkalan mɔ so abɛɛ n naa n kya lɛɛ mɔ-ɔkalan mɔ

mi-i nyiile asa mɔ, imɔ dɔ pɛwu mɔ, Wurubuaarɛ kya wɔra ilaa ɔ kya sa me-rɛ fɛye.

⁸ Wurubuaarɛ mɔ-nkon ne n nyi gɛnɔɔbono n dɛ Kirisito Yesu gɛsalaarɛ me-gisen dɔ n kpɛ mi-i nyingi fɛye pɛwu so mɔ. ⁹ Me-gɛdalaa ne n gyɛ yɛɛ fɛye-gɛsalaarɛ gɛbono fɛ bo mɔ gɛ' kpɛ gɛ kya nyaakyɔ gɛ kya too fɛye-asen dɔ, de fɛ' kpɛ fa-a nyɛ Wurubuaarɛ ɔlaako ginyi kee de fɛ' nyɛ bii barage yɛɛ imɔ idɛ abɛɛ idɛ ne n boran. ¹⁰ Imɔ ne nan yɛgɛ fɛ laa nyɛ sɔɔ ilaa ibono i boran gɛkpaa mɔ kyule. Gɛnen kee ne gɛkaabono Kirisito laa kii ba mɔ, fɛye-asen dɔ i laa fuuli ne ɔ maŋ wu ilaa nyɛnyɛn iko fɛye-nyoro so tɔgɛ. ¹¹ Fɛ laa san fa-a wɔra ilaa kpɛi-kpɛi ibono i kya lii gisen dɛnsɛ dɔ kyu naa de Yesu Kirisito so de i' kyu nyisigyɛ de ayenbi kyu bara Wurubuaarɛ.

N Tii De Obu Mɔ, I Kya Wɔra ɔdan Daa Too

¹² Me-nanboana Yesu asonbo, n kya laarɛ fɛ' bii yɛɛ ibono n tii de obu faa, Yesu ɔkalan konkonsɛ mɔ gi kii nyɛ yɛlegɛ daa too. ¹³ Kyu lii imɔ so mɔ Rom awura asogya de asa sɛnsɛ pɛwu abono mɛ bo gɛrɛ mɔ mɛ nyɛ bii yɛɛ Yesu Kirisito gɛsun ne n' kya wɔra so ne mɛ keda me tii de obu gɛnen. ¹⁴ Gɛnɔɔbono n tii de obu mɔ, i yɛgɛ aye-nanboana sakyɔ mɛ nyɛ ka gyan aye-Wura Yesu so bɔla. I kya san keda ɔmɔ-nyoro de mɛ' tɔgɛ Wurubuaarɛ agyɛbi ibono mɛŋ kya seɛ nyamesɛ gifuu.

¹⁵ I bo no yɛɛ ako mɛ mɛŋ dɛ gɛwɔnsa dɛnsɛ kyu lii me so ne mɛ naa ma-a tɔgɛ Kirisito ilaa. Me-ilaa i bo mɔmɔ gɛlaaloo. Ako, mɔ, mɛ dɛ me so gɛwɔnsa dɛnsɛ so ne mɛ naa ma-a tɔgɛ Kirisito ilaa. ¹⁶ Mɔmɔ abono berɛ, gɛsalaarɛ gɛbono mɛ bo sa me mɔ so ne mɛ kya tɔgɛ Kirisito ilaa. Mɛ nyi yɛɛ Wurubuaarɛ gi kyu gɛsun gɛdɛ wɔra me-abaa dɔ, ne o kyule yɛɛ mɔ-akyobo mɛ' keda me

tii de obu de n' nyɛ lɛɛ tɔgɛ sa asa yɛɛ Kirisito ɔkalan mɔ gyɛ gɛsintin. ¹⁷ Ako mɔ berɛ, mɛ kya tɔgɛ Kirisito ɔkalan mɔ mɔ, mɛ mɛɲ dɛ gɛwɔnsa kolon. Mɛ kya laarɛ asa mɛ' buu ɔmɔ taa me yɛgɛ. Mɛ nyi yɛɛ ibono n tii de obu faa, mɔmɔ-ilaa tɔgɛsɛ mɔ i laa yɛgɛ i' siile me-ɔɔ daa. ¹⁸ Imɔ ibono iɲ tiri me. Mɛ dɛ gisen dɛnsɛ-o, mɛɲ dɛ gisen dɛnsɛ-o, ɔkpa kamaasɛ so mɔ, mɛ ti taa nyɛ lɛɛ Kirisito ɔkalan mɔ tɔgɛ. Imɔso i bo me ɔkon gbaa daa.

¹⁹ I lii fɛɛ fɛ kya dalaa sa me, ne Yesu Kirisito Oduduu mɔ kya kpaɛ me. Imɔso n nyi yɛɛ imɔ idɛ pɛwu i laa yɛgɛ n' nyɛ Wurubuaarɛ amɔlɛgɛ. ²⁰ I kya nyiile yɛɛ ibono mɛ keda me tii de obu faa, ilaa ibono me-ansi a tansi a gyan ne n' kerɛ imɔ-ɔkpa mɔ ne n gyɛ yɛɛ mɛɲ sa n' gyi ipeeli ilaa iko-rɛ iko dɔ de n' taalɛ da otu gɛkpaɛ, i gyɛ daa lɛwu mɔ, lɛwu, nkpa mɔ, nkpa. I ba gɛnen mɔ de Yesu Kirisito ne ɔ' nyɛ nyisigyɛ kyu naa de me so aberɛ adɛ dɔ de owi kamaasɛ dɔ kee.

²¹ I kya nyiile yɛɛ me asɛ mɔ, n tɛ nkpa mɔ, Yesu wole ne n tiri me. Lɛwu ne nɛ kii baa wu' mɔ, i laa lɔrɔ wɔra ɔdan sa me daa. ²² Nengyene fɛɛ nɛ kyena nkpa tu kpe mɔ, nan wɔra gɛsun gɛbono gɛ laa kpaɛ Yesu ilaa de i' kpe ansi dɔ. Mɛɲ nyi ibono n' lɛɛ, nkpa abɛɛ lɛwu fɛɛ. ²³ N kyɔlɛ imɔ inyɔ nsana ne. Me-lɛɛ gɛlaarɛ dɔ mɔ, nkana n' tɛsɛ taa gɛrɛ-lɛɛ gɛkyena gɛdɛ yɛgɛ de n' kpaɛ kyena Yesu asɛ Wurubuaarɛ dɔ. Ibono ne n boran gikyɔ don. ²⁴ Fɛye so mɔ mɔ, i kii i tiri yɛɛ n' kyena nkpa tu kpe. ²⁵ N tansi n nyi yɛɛ n tiri sa fɛye pɛwu. Gɛnen so mɔ, n nyi kee yɛɛ nan nyɛ nkpa lii obu mɔ dɔ baa tu fɛye de n' nyɛ kpaɛ fɛye. Imɔ ne nan yɛgɛ fɛ' nyɛ kpe ansi dɔ de i' wɔra fɛye ɔkon fɛye-gisɔɔgyi gibono fɛ bo sa Yesu mɔ dɔ. ²⁶ Nɛ kii baa tu fɛye de alanfiya mɔ, i laa yɛgɛ i' tansi wɔra fɛye ɔkon de fɛ' yen Kirisito Yesu kyu naa de ilaa ibono ɔ wɔra sa me mɔ so.

Fɛ' Pɛɛɛɛ Ansi Yesu Gɛsun Mɔ Dɔ

²⁷ Ilaa ibono i tansi i tiri mɔ ne n gye yɛɛ fɛ' kyena akyenabi abono a kya kaabore ɔkalan konkonse ɔbono fɛ nu kyu lii Yesu Kirisito so mɔ. Nengyene nɛ baa laa fɛye-o, meɲ baa laa fɛye-o, n kya laare n' nu daa yɛɛ fɛ yeɛ fɛye-ayaa so girin fɛɛ nyamesɛ kolon fɛye-gisɔɔgyi gibono fɛ bo sa Yesu mɔ dɔ, fɛ kya sa gɛwɔnsa kolon, fɛ kya pɛɛɛɛ ansi dabɔɛ, de asa mɛ' nyɛ sɔɔ Yesu ɔkalan konkonse mɔ gyi. ²⁸ N kya laare n' nu kee yɛɛ fɛye abono fɛ kya ka gyan Yesu so mɔ fɛɲ kya sele fɛye-akyobo baa pii. Fɛɲ sele ɔmɔ mɔ, i laa lɛɛ ilaa ibono Wurubuaare dɛ mɔ nyiile yɛɛ mɛ laa fuɛ mɔmɔ-lɛwu gɛmara, ne i laa lɛɛ nyiile kee yɛɛ fɛye, mɔ, fɛ laa nyɛ ɔkyenaten Wurubuaare asɛ. Wurubuaare ne n kya sa gɛnen ɔkyenaten ɔbono. ²⁹ I kya nyiile yɛɛ Wurubuaare gi wɔra ilaa sa fɛye ne fɛ nyɛ kyu fɛye-nyoro too Yesu Kirisito so. Ne iɲ gye imɔ ibono wolɛ. ɔ wɔra ilaa sa fɛye kee ne fɛ nyɛ fɛ kya wu ɔlaawusɛ fɛ kya sa Yesu. ³⁰ Fɛye-ɔlaawusɛ ɔbono fɛ kya wu mɔ, i gye daa ɔlaawusɛ ɔbono ɔnan fɛ wolaa wu me nɛ naa kyena wu ne fɛ kya nu yɛɛ n san mi-i wu mɔ mɔ.

2

Fɛ' Bara Fɛye-Nyoro Gɛsɛ Wɔra Fɛɛ Yesu

¹ Fɛye-rɛ Yesu Kirisito ginyamesɛ kolon so mɔ, i kya keda fɛye-nyoro. Gɛnɔɔbono Kirisito kya laare fɛye-ila mɔ, i kya yɛɛɛ i kya tɔɔ fɛye-asen. Wurubuaare Oduduu mɔ kya sa fɛye gɛnɔ kolon. Fɛ kya su abara so lii fɛye-asen dɔ. ² Imɔ idɛ pɛwu i bo fɛye dɔ faa, fɛ' yɛɛɛ i' tɛsɛ wɔra me ɔkon kpaa logɛ. Fɛ' nyɛ gɛnɔ kolon de gɛlaare' fɛye-gɛkyena dɔ kpaa logɛ. Fɛye-asen dɔ de fɛye-nwɔnsa dɔ i' wɔra fɛɛ nyamesɛ kolon ne fɛ gye. ³ Fɛɲ sa fɛ' wɔra sɛi de i' wɔra gikoso gɛgyanbuɛ

gɛkyena abɛɛ fɛ' nyiile fɛye-nyoro. Fɛ' bara fɛye-nyoro gɛsɛ de fɛ' kalɛ fɛye-nanboana wɔra asa dɔ don fɛye-nyoro. ⁴ Fɛ mɛɲ sa fɛ' kerɛ fɛye-lɛɛ wolɛ so. Fɛ' kerɛ fɛye nanboana-lɛɛ kee so. ⁵ Fɛye-nwɔnsa gi' wɔra fɛɛ gɛnɔɔbono Kirisito Yesu-lɛɛ gɛwɔnsa gɛ dɛ mɔ.

⁶ Yesu dabɔlɛ ɔ gyɛ Wurubuaarɛ oyuduu faa mɔ,
 ɔ mɛɲ kerɛ yɛɛ mɔ-rɛ Wurubuaarɛ mɛ gyɛ kyɛɛ-kyɛɛ so mɔ,

ɔ' yelɛ imɔ so gyi gɛwura buu de Wurubuaarɛ.

⁷ ɔ too imɔ ibono pɛwu fuɛ.

Ne ɔ baa kyu daa isa ɔbono ɔnan ɔ tɛ owura asɛ mɔ oyuduu.

Nyamesɛ oyuduu ne i kyu korogɛ mɔ.

⁸ O wu yɛɛ ɔ gyɛ nyamesɛ oyuduu gɛnen mɔ,

ɔ bara mɔ-nyoro gɛsɛ

ne o nu Wurubuaarɛ gɛdɛ kaaborɛ ɔ' nyɛ lɛwu gbaa.

Lɛwu ɔbono ɔnan o kyule ne o wu' mɔ gyɛ daa ipeeli lɛwu.

Mɛ da mɔ aɲanbi oyii so mɔɔ.

⁹ Imɔ idɛ so mɔ, Wurubuaarɛ gi kosorɛ mɔ-gimu gikyɔ kyɔdɛ,

ne ɔ yela mɔ ginyen gibono gi don ginyen kamaasɛ mɔ.

¹⁰ Wurubuaarɛ gi kosorɛ mɔ-gimu gɛnen

de i' ba yɛɛ ɔkamaasɛ ɔbono o nu mɔ Yesu ginyen mɔ,

o' ɲmii daa mɔ.

Nyamesɛ kamaasɛ, ɔ bo Wurubuaarɛ dɔ-o,

ɔ bo gɛsinkpan so-o,

ɔ loo gɛsinkpan dɔ-o,

o' ɲmii daa Yesu.

¹¹ De ɔkamaasɛ o' bugi gɛnɔ tɔgɛ yɛɛ,

“Yesu gyɛ Wura.”

De i' kyu nyisigy kyu bara mɔ-sɛ Wurubuaarɛ.

Fɛ' wɔra fɛɛ agyɛkpebi abono a kya ɲɛlegi gibiri dɔ mɔ

¹² Imɔso me-nanboana laarɛɛ, fɛɛ gɛnɔɔbono fɛ kya nu me-gɛdɛ owi kamaasɛ dɔ mɔ, idɛ kon ibono meɲ bo fɛye asɛ faa, fɛ' pɛɛɛ ansi nu me asɛ don owi ɔbono n bo fɛye asɛ nno mɔ. Fɛ' tansi seɛ Wurubuaarɛ de fɛ' pɛɛɛ ansi wɔra ilaa ibono i laa lɔrɔ fɛye-ɔkyenaten yela Wurubuaarɛ asɛ mɔ. ¹³ I lii fɛɛ Wurubuaarɛ kee kya wɔra mɔ-lɛɛ gɛsun fɛye-asen dɔ. ɔ yɛgɛ fɛ nyɛ kyu mɔ-ilaa too fɛye-nyoro so ne ɔ kya yɛgɛ fɛ' nyɛ wɔra imɔ kee de i' kyena de mɔ-ɔbolɛ gɛlaarɛ.

¹⁴ Ilaa kamaasɛ ibono fɛ laa wɔra mɔ, fɛ mɛɲ sa fɛ' lɔgedɛ abɛɛ fɛ' sɔɔ akyɔɔɛ de Wurubuaarɛ. ¹⁵ Imɔ ne nan yɛgɛ fɛye-asen dɔ i laa nyɛ fuuli ne i maɲ nyɛ ilaa nyɛnyɛn iko fɛye-nyoro so. Fɛ laa wɔra Wurubuaarɛ mɔ-biana gɛsintin. I maɲ nyɛ ineesi iko fɛye-nyoro so, yɛgɛ fɛ tɛ saarɛ ndɛ asa abono mɛ kya wɔra ibono iɲ gyɛ iwɔrasɛ mɔ. I keda ɔmɔ da kyɛɛɛ fɛɛ gikotoo. Gɛnen asa adɛ nsana mɔ, fɛ laa ɲɛlegi fɛɛ agyɛkpebi. ¹⁶ Fɛ dɛ agyɛbi abono a kya sa anyamesɛ Wurubuaarɛ asɛ gɛkyena ɔnan mɔ fa-a nyiile asa. Imɔ idɛ pɛwu ne nan yɛgɛ n' yen fɛye me-gisen dɔ gɛkaabono Yesu Kirisito laa kii ba mɔ. I laa wɔra me ɔkon yɛɛ meɲ nyanga ansi wɔra gɛsun gɛdɛ too nkyu dɔ giyan. ¹⁷ Fɛye-gikagyan gibono fɛ kya ka gyan Yesu so mɔ gi dɛ fɛɛ asunbi ne fɛ kya lɛɛ fa-a sa Wurubuaarɛ. Ne fɛɛ me-nkalan ne nan wɔra fɛɛ nta nbono mɛ lɛɛ asunbi ne mɛ kya worogɛ mɔ, nkana i laa wɔra me ɔkon. I nyɛ ba gɛnen mɔ, nan gyi ɔkon de i' yɛgɛ fɛye kee fɛ' gyi ɔkon. ¹⁸ Gɛnen kee ne fɛɛ i ba gɛnen mɔ, i kaaborɛ fɛ' yɛgɛ i' wɔra fɛye ɔkon de i' nyɛ wɔra me kee ɔkon.

Timoti De EpaforoditusE Ilaa

¹⁹ Kyu lii Wura Yesu so mɔ, n kya sa gɛwɔnsa yɛɛ i maŋ kɛɛla ne nan sun Timoti fɛye aɛ. Nɛ nyɛ nu fɛye so mɔ de me-gisen gi' tɔrɔ me. ²⁰ Mɛŋ baa n bo ɔko fɛɛ mɔ. Fɛye-ila a i tiri mɔ lii mɔ-gisen dɔ. ²¹ Asa sɛnsɛ berɛ mɛ kya kerɛ mɔmɔ-lɛɛ daa pɛi. Iŋ gyɛ Yesu Kirisito-lɛɛ. ²² Fɛye gbaa-gbaa fɛ nyi gɛnɔɔbono Timoti baarɛ gi lɛɛ mɔ-gidebi wolaa nyiile mɔ. Me-rɛ mɔ a kya wɔra Wurubuaarɛ ɔkalan konkonsɛ mɔ so gɛsun dabɔlɛ mɔ, a wɔra fɛɛ ɔsɛ de obi. ²³ Imɔso nɛ kpɛ wu gɛnɔɔbono me-ila a i kya kpɛ de mɔ, nan keda mɔ sun fɛye aɛ. ²⁴ Wura Yesu ɔlon dɔ mɔ, nɛ sɔɔ gyi yɛɛ i maŋ kɛɛla ne me gbaa-gbaa kee nan ba fɛye aɛ nno.

²⁵ Nɛ kerɛ faa, Epaforoditusɛ, aye-nanbo Yesu ɔson mɔ dɔ ɔbono fɛ lɛɛ sun yɛɛ ɔ' baa kye me-takpo mɔ, i tiri yɛɛ n' lɛɛ mɔ-ɔkpa de o' kii ba fɛye aɛ. Me-rɛ mɔ a wɔra gɛsun ne a kɔ sa Wurubuaarɛ ɔson mɔ dabɔlɛ. ²⁶ ɔ kya nyingi fɛye pɛwu so. O nyi ibono fɛ nu mɔ-gilɔ mɔ so, ne i bo mɔ gɛwɔnsa yɛɛ ɔfaa fɛ tɛ de nɔwɔnsa. ²⁷ Gɛsintin so mɔ, ɔ lɔ. ɔ laarɛ o' wu gbaa. Wurubuaarɛ ne n su mɔ so. I mɛŋ gyɛ mɔ wolɛ. O su me kee so de mɛŋ baa kii wu gɛnsinyan baa bɔla de ibono n kya wu faa. ²⁸ Gɛnen so mɔ, i kpɛ i kya da me kpa-kpa yɛɛ n' yɛgɛ mɔ de o' kii ba fɛye aɛ kusaa. Fɛ kii wu mɔ mɔ, i laa wɔra fɛye ɔkon, de me kee me-gisen gi' tɔrɔ me. ²⁹ Imɔso fɛ wu mɔ mɔ, fɛ' kyu ɔkon beɛ sɔɔ mɔ abaa anyɔ Wura Yesu ginyen dɔ de fɛ' kyu buubuu kyu sa gɛnen asa abono ɔnan. ³⁰ I san pii ɔfaanan o wu' Kirisito gɛsun mɔ so. Ilaa ibono fɛ laa wɔra sa me mɔ, ɔ yeɛ fɛye-giyaa dɔ wɔra imɔ kaabore mɔ-nkpa gi laarɛ gi' lii mɔ-gibaa.

3

Fɛ' Keda Wura Yesu ɔson

¹ Me-nanboana Wura Yesu ɔson mɔ dɔ, ibono i san mɔ ne n gyɛ yɛɛ fɛ' yɛgɛ i' wɔra fɛye ɔkon fɛye-rɛ Wura Yesu ginyamesɛ kolon mɔ so. Ilaa ibono nɛ wolaa ηmarasɛ bunge fɛye mɔ, nɛ kii ηmarasɛ imɔ kii bunge fɛye mɔ, i maɲ loo me. I laa kpaa fɛye daa. ² Fɛ' kerɛ fɛye-nyoro so dandan. Ako mɛ dɛ n wɔnsa nyɛnyɛn ma-a wɔra aye-gɛsun mɔ ɔnan. Mɛ kya laarɛ mɛ' nyɛ fɛye penɛ daa. Awɔrɛ giten ilaa ne n kpɛ i tiri ɔmɔ. ³ Inj gyɛ awɔrɛ giten ne n kya nyiile yɛɛ nyamesɛ gyɛ Wurubuaarɛ sonbo. Ilaa ibono i kya nyiile yɛɛ a gyɛ Wurubuaarɛ asonbo gɛsintin mɔ ne n gyɛ yɛɛ a kya kyu Wurubuaarɛ Oduduu mɔ kyu son mɔ. A kya diirɛ aye-nyoro kyu naa daa de Kirisito Yesu ilaa wɔrasɛ wolɛ so. A kya kine yɛɛ a maɲ ka gyan aye anyamesɛ-lɛɛ gidebi so.

⁴ I bo no yɛɛ nan taalɛ ka gyan me-itiibilaa de me-nbara gigyi so. Fɛɛ ɔko laa taalɛ ka gyan mɔ-itiibilaa de mɔ-nbara gigyi so de i' mɔlɛgɛ mɔ mɔ, nkana me ne nan wɔra ɔgyangbarabo. ⁵ Imɔ gɛsɛ ne n gyɛ yɛɛ mɛ korogɛ me mɔ, imɔ gɛkɛ kuesɛ mɔ, mɛ ten me-giwɔrɛ Wurubuaarɛ nbara mɔ ɔkpa so. N gyɛ daa Isirale awura abono Wurubuaarɛ gi yela mɔ-nbara sa mɔ obi. Nɛ lii daa Bɛngyamin gɛten dɔ. Me-rɛ me-sɛ de me-nyi pɛwu aye-gɛdɛ ne n gyɛ Hiiburu, aye Gyuda awura gɛdɛ mɔ. Wurubuaarɛ nbara mɔ ne n tiri me so mɔ, nɛ baa wɔra Farasii awura gikpen mɔ dɔ isa. ⁶ Nɛ pɛɛrɛ ginsi sa Wurubuaarɛ nbara mɔ gikyɔ. Gɛnen so gbaa mɔ, nɛ wu yɛɛ Yesu asonbo mɔ mɛ kya son Wurubuaarɛ ɔkpa banban ɔko so mɔ, nɛ biidɛ ɔmɔ-giso. N kya gyi Wurubuaarɛ nbara mɔ so ibono ɔko mɛɲ wu ilaa nyɛnyɛn iko me-nyoro so tɔgɛ.

⁷ Imɔ-rɛ imɔ gɛnen gbaa mɔ, ilaa ibono nkana n nyi yɛɛ imɔ ne nan mɔlɛgɛ me Wurubuaarɛ asɛ mɔ, mɛɲ baa mi-i ka gyan imɔ so. Gɛnɔɔbono nɛ nyɛ bii Yesu

Kirisito so mɔ, nɛ kyu me-nbara so gigyi mɔ pɛwu yɛɛ iŋ baa i gyɛ ilaa gbaa' iko sa me. ⁸ Gɛsintin mɔ, n kya kyu ilaa kamaasɛ yɛɛ iŋ baa i bo ilaa dɔ. Ibono i don ilaa kamaasɛ gbaa bun sa me mɔ ne n gyɛ ibono nɛ nyɛ bii me-Wura Kirisito Yesu. Kyu lii Kirisito so mɔ, nɛ taa ilaa kamaasɛ ibono nkana n kya wɔra mɔ yɛgɛ. Nɛ san kyu imɔ yɛɛ imɔ pɛwu i gyɛ daa gibiinaa so ilaa. Imɔ ne nan yɛgɛ ne Yesu Kirisito laa nyɛ wɔra me-lɛɛ ⁹ de me-rɛ mɔ a san wɔra nyamesɛ kolon. Maŋ baa tɔgɛ yɛɛ nan gyi Wurubuaarɛ nbara mɔ so me-gibaa so de o' kyu me yɛɛ me-gisen dɔ i boran. ɔ kya kyu me-gisen dɔ yɛɛ i boran kyu naa daa de gikagyan gibono nɛ ka gyan Kirisito so mɔ. ¹⁰ Nɛ too ilaa kamaasɛ fuɛ daa de n' nyɛ bii Kirisito dɔɔdan. N kya laarɛ n' wu mɔ-ɔlon ɔbono ɔ bo ne ɔ taalɛ kyingi lii ibuni dɔ mɔ, de n' wu mɔ-awɔrɔfɔɔ mɔ ɔnan kee, de n' baa wɔra fɛɛ mɔ, gɛnɔɔbono ɔ taalɛ wu' sa asa mɔ ¹¹ de, Wurubuaarɛ gi kyule mɔ, me kee n' nyɛ kyingi lii ibuni dɔ gɛnen.

Abono Mɛ Ti Sɛɛ Wurubuaarɛ ɔson Dɔ Mɔ Nwɔnsa ɔnan

¹² I mɛŋ gyɛ yɛɛ me-gibaa gi ti yii ilaa ibonoana n dare faa abɛɛ nɛ ti wɔra imɔ kpaa logɛ berɛ. N san n dɛ imɔ dɔ n kya pɛɛɛ ansi de n' laa gibaa keda ilaa dɛnsɛ ibono so Kirisito Yesu gi laa gibaa keda me kyu me wɔra mɔ-lɛɛ mɔ. ¹³ Me-nanboana Yesu asonbo, ilaa ibono n kya laarɛ mɔ, meŋ kya kyu imɔ yɛɛ me-gibaa gi ti yii imɔ. Ilaa kolon ibono n kya wɔra mɔ ne n gyɛ yɛɛ n kya lɛɛ ansi taa ibono i bo me-gɛmara mɔ pɛwu yɛgɛ de n' san nyanga ansi seɛ n gya ibono i bo me-ansi dɔ mɔ. ¹⁴ Wurubuaarɛ dɔ ilaa ne nɛ nyanga ansi n seɛ n gya gɛnen. Imɔso ne Wurubuaarɛ gi tɔgɛ me yɛɛ n' kyu me-nyoro sa mɔ de o' kyu gɛnen ilaa ibono sa me kyu naa de me-rɛ Kirisito Yesu ginyamesɛ kolon mɔ so.

¹⁵ Fɛ' yɛgɛ aye abono a ti sɛɛ Wurubuaarɛ ɔson mɔ dɔ mɔ a' sa daa me-gɛwɔnsa gɛdɛ ɔnan. Nengyene fɛ kya sa nwɔnsa nko kpɛi berɛ mɔ, Wurubuaarɛ ne nan lɛɛ gɛsɛ nyiile fɛye. ¹⁶ Imɔ-rɛ imɔ gɛnen mɔ, fɛ' yɛgɛ de a' puge ibono ɔkara a ti a dɛ a tɛ faa dɔ.

Gɛkyena Gɛbono Gɛ Kya Bara Ansikyu Mɔ

¹⁷ Me-nanboana Yesu asonbo, fɛ' kasɛ gɛnɔɔbono n dɛ mɔ de fɛ' kerɛ asɛnsɛ abono a nyiile mɔmɔ ne mɛ tɛ gɛnen gikyenabi mɔ de fɛ' kasɛ mɔmɔ kee. ¹⁸ I kya nyiile yɛɛ asa abono mɛ mɛɛ dɛ akyenabi abono ɔnan mɔ mɛ nyaakyɔ. Nɛ wolaa tɔgɛ mɔmɔ-ilaa sa fɛye. Idɛ kon n kii mi-i tɔgɛ ɔmɔ so ilaa mi-i sa fɛye faa, me-ansi a kya kpelegɛ nkyu gbaa. Mɔmɔ-gɛkyena gɛ dɛ daa fɛɛ asa abono mɛ kya kyo amɔlɛgɛ lɛwu ɔbono Yesu gi wu' lɛwu oyii so mɔ. ¹⁹ Gɛnen asa abono mɛ laa wu ilaa ibono mɛ laa naa de mɔ. Mɛ laa fuɛ mɔmɔ-lɛwu gɛmara. Mɔmɔ-itɔ ne mɛ kya son. Ilaa ibono i gyɛ ipeeli ilaa mɔ, imɔ, mɔ, ne mɛ kya kyu gyiide. Mɔmɔ-nwɔnsa gi gyan daa gɛsinkpan ilaa wolɛ so.

²⁰ Aye abono a kya son Yesu mɔ berɛ, aye-gɛwi ne n gyɛ Wurubuaarɛ dɔ. Wurubuaarɛ dɔ ne aye-ansi a gyan yɛɛ ɔko laa lii de ɔ' baa mɔlɛgɛ aye. Mɔ ne n gyɛ Wura Yesu Kirisito. ²¹ ɔ laa baa kyɛɛgɛ aye-anyamesɛ nyoro gibi gibono giɲ bo giko dɔ mɔ wɔra fɛɛ mɔ-lɛɛ nyoro nbono gi bo nyisigyɛ mɔ. ɔlon ɔbono ɔ bo ne ɔ kya taalɛ yɛgɛ ilaa kamaasɛ i kya bara imɔ-nyoro gɛsɛ sa mɔ mɔ ne ɔ laa kyu kyɛɛgɛ aye-nyoro mɔ gɛnen.

4

¹ Imɔso me-nanboana Yesu asonbo, fɛye abono n kya laarɛ fɛye-ilaa mɔ, n kya nyingi fɛye so. Fɛ kya yɛgɛ

i kya wɔra me ɔkon ne fɛ kya kosorɛ me-gimu. Me-kyɛmenɛana laarɛsɛ, fɛ' yelɛ fɛye-ayaa so girin Wura Yesu ɔson mɔ dɔ fɛɛ gɛnɔɔbono nɛ nyiile fɛye mɔ.

Ḡɛnɔɔbono Fɛ Laa Nyɛ Gisen Yuuli Mɔ

² N kya kolɛ Yuwodiya ne n' kya kolɛ Sintikii yɛɛ mɛ' tɔgɛ kyule abara Wura Yesu ginyen dɔ. ³ Fo ɔbono mɔ fo gyɛ me-nanbo gɛsun mɔ dɔ gɛsintin so mɔ, fo-o fo mɔ kee, n kya kolɛ fo yɛɛ fo' kpaɛ gɛnen akyii anyɔ adɛ de mɛ' tɔgɛ kyule abara. Me-rɛ ɔmɔ ne n kpon Yesu ɔkalan mɔ so gɛsun mɔ giwɔra dɔ. Me-rɛ ɔmɔ ne n wɔra gɛsun, dabɔlɛ de Keleɛmentɛ mɔ-rɛ me-nanboana asɛnsɛ abono Wurubuaarɛ gi ɲmarasɛ mɔmɔ-anyen wɔra mɔ-ɔwolɛ dɔ yɛɛ mɛ laa nyɛ ɔkyenaten mɔ asɛ mɔ.

⁴ Owi kamaasɛ dɔ mɔ fɛ' yɛgɛ i' wɔra fɛye ɔkon kyu naa de fɛye-rɛ Wura Yesu ginyamesɛ kolon mɔ so. N' kii mi-i tɔgɛ imɔ ginyɔsɛ yɛɛ fɛ' yɛgɛ i' wɔra fɛye ɔkon. ⁵ Fɛ' kyu gisen kyena de asa kanpɛ de ɔkamaasɛ o' wu. I kya nyiile yɛɛ owi ɔbono Wura Yesu laa kii ba mɔ gi fuude. ⁶ Fɛ mɛɲ sa fɛ' kyena de nwɔnsa iko-rɛ iko dɔ. Ilaa kamaasɛ ibono i laa ba mɔ, fɛ' kyu too Wurubuaarɛ ansi dɔ. Fɛ' dalaa kolɛ mɔ, de fɛ' kyu afaala sa mɔ kee fɛye-ndalaa dɔ. ⁷ Fɛ kya dalaa gɛnen mɔ, fɛ laa nyɛ Wurubuaarɛ gisen yuuli gibono ɔ kya sa anyamesɛ ne mɛɲ kya taalɛ bii imɔ-ɔkara mɔ. Fɛye-asen de fɛye-nwɔnsa gi laa kyena fɛye gɛten kolon kyu naa de fɛye-rɛ Kirisito Yesu ginyamesɛ kolon mɔ so.

⁸ Me-nanboana Yesu asonbo, pɛi de me-gɛnɔ gɛ' yii mɔ, n' tɔgɛ fɛye yɛɛ fɛ' kpɛ fa-a sa gɛwɔnsa kyu lii daa gɛsintin ilaa so, nyisigyɛ ilaa so, gisen dɛnsɛ ilaa so, ilaa ibono i dɛ ɔkpa mɔ so, ilaa ibono i bo kanpɛ mɔ so, de ilaa ibono i bo ɔbolɛ mɔ so. Ilaa kamaasɛ ibono i boran ne ayenbi a kya kaaborɛ imɔ mɔ, imɔ ibonoana so ne fɛ' kyu fɛye-nwɔnsa gyan. ⁹ Ilaa ibono fɛ kasɛ, ne fɛ sɔɔ kyule,

ne fε nu, ne fε wu lii me aεε mɔ, imɔ ne fε' wɔra. Fε wɔra gɛnen mɔ, fεye-rε aye-gisen yuuli gεmu Wurubuaarε fε laa kyena.

N Kya Faala Fεye Ibono Fε Bunge Me Ilaa Mɔ

¹⁰ Kyu lii aye-Wura Yesu so mɔ i bo me ɔkon gεsintin so yεε idε kon ibono fε bunge me ilaa faa mɔ, fε kii lεε nyiile me yεε fε kya nyingi me so. Nkana fε kya nyingi me so berε. Fε mεη nyε ɔkpa daa de fε' lεε imɔ nyiile me. ¹¹ Iη gyε yεε n kya tɔgε yεε ilaa iko i tiri me berε daa. Me berε, nε kase bii yεε ilaa kamaase ibono i tu me mɔ, i kaabo sa me. ¹² Ayen a dε me mɔ, n nyi me-nyoro akedabi. Ne ilaa i kii gbigi de me mɔ, n nyi me-nyoro akedabi. Nε kase ne nε bii gɛnen akyenabi adε. Ilaa kamaase ibono i laa tu me mɔ, n kya sɔɔ abaa anyɔ. Agyudɔ a gbigi me aεε, abεε akon a tɔrɔ me so, atɔ a bo me aεε gikyɔ abεε ayen ne n dε me mɔ, imɔ pεwu dɔ mɔ, n kya bii me-nyoro akedabi. ¹³ Me-rε Yesu Kirisito ginyamesε kolon dɔ so mɔ, nan taalε wɔra ilaa kamaase. Mɔ ne n kya sa me ɔlon. ¹⁴ Imɔ-rε imɔ gɛnen mɔ, fε kpaa me me-ɔlaawuse dɔ faa mɔ, fε gyε asa. ¹⁵ Fεε gɛnɔɔbono fεye Filipayi awura fε nyi mɔ, lii owi ɔbono fε daa ginu Yesu ɔkalan konkonse mɔ ne nε koso lii fεye aεε Masadoniya gεsinkpan so mɔ, fεye-wolε ne n gyε Yesu asonbo gikpen gibono fε kyu too fεye-nyoro so yεε fε laa kerε me so de n' naa mi-i wɔra Yesu gεsun mɔ. Fεye-gibaa gi kya tu me ne me-gɛnɔ mɔ gε kya kpe fεye aεε. ¹⁶ N san n bo fεye-gεsinkpan so Tεsalonika ɔsowolε so gbaa mɔ, fεye-gibaa mɔ gi tu me nno mɔ, iη gyε gikolon.

¹⁷ I mεη gyε yεε ilaa ibono fε kpε fa-a sa me mɔ ne n tiri me. Ntεεla nbono fε laa nyε Wurubuaarε dɔ ne i laa kpε i kya nyaakyɔ i kya too mɔ ne n tiri me. ¹⁸ Ilaa ibonoana pεwu fε kyu sun Epaforodituse yεε o' kyu bara

me mɔ, i yii me-gibaa. Fɛ yɛgɛ nɛ nyɛ ilaa kamaasɛ ibono i tiri me mɔ kii san. Ilaa ibonoana fɛ bunge me mɔ, i dɛ fɛɛ asunbi bofensɛ ne fɛ lɛɛ sa Wurubuaarɛ. Wurubuaarɛ gi sɔɔ amɔ, ne a gyi mɔ-ginsi. ¹⁹ Me-Wura Wurubuaarɛ mɔ ne nan sa fɛye fɛye-ilaa kamaasɛ ibono i tiri fɛye mɔ kyu naa de fɛye-rɛ Kirisito Yesu ginyamesɛ kolon mɔ so. Wurubuaarɛ ne n gyɛ ɔbono ɔ tansi ɔ bo ilaa dɛnsɛ kamaasɛ. ²⁰ Nyisigyi ɔ' wɔra aye-sɛ Wurubuaarɛ-lɛɛ gɛkpa-gɛkpa. I' ba gɛnen.

Afaala Laalalogɛ

²¹ Fɛ' faala ɔkamaasɛ ɔbono Wurubuaarɛ gi lɔɔ yela sa mɔ-nyoro kyu lii mɔ-rɛ Kirisito Yesu ginyamesɛ kolon so mɔ sa me. Aye-nanboana abono mɛ kya son Yesu ne mɛ bo me asɛ gɛɛnaa mɔ pɛwu mɛ kya faala fɛye. ²² Mɔmɔ abono pɛwu Wurubuaarɛ gi lɔɔ yela sa mɔ-nyoro mɔ mɛ kya faala fɛye. Abono mɛ kya faala fɛye gikyɔ-gikyɔ mɔ ne n gyɛ abono mɛ bo Rom wura belɛ mɔ gɛten dɔ mɔ. ²³ Aye-Wura Yesu Kirisito ɔ' sa fɛye ɔkamaasɛ so gɛwɔnsa dɛnsɛ de fɛye-oduduu dɔ ilaa i' wɔra ɔdan sa fɛye.

ḠḠḠḠ ḠḠḠḠḠḠ, ḠḠḠḠḠ ḠḠḠḠḠḠḠ ḠḠ ḠḠḠḠ ḠḠḠḠḠ
AnyamesḠ ḠḠ ḠḠḠḠ ḠḠḠḠ

The New Testament in the Gikyode language

copyright © 2020 Wycliffe Bible Translators, Inc.

Language: Gikyode

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 14 Jun 2022 from source files dated 30 Nov 2021

4cc402b4-139a-5f33-9af9-fbf62307f663